



INATSISARTUNI

Partii Inuit
Randi Broberg

UPA 2014/129-1
29.4.2014

Pillugu siunnersuut: **Kalaallit Nunaata Aatsitassarsiornermi Aningasaateqarfia pillugu**
Inatsisartut inatsisaata allanngortinnissaa pillugu nr. 6 5. december 2008-imeersoq
Inatsisartut inatsisaat nr. xx, xx.xxxx-imeersoq.
(Inuussutissarsiornermut Aatsitassanullu Naalakkersuisoq)

Partii Inuit maluginiarparput, siunnersummi pineqarmat aatsitassarsiornikkut isertitat suussusilerneqarnerat, aammalu Aatsitassarsiornermi Aningasaateqarfip atuutilernissaa qaqugukkut pissanersoq.

Naalakkersuisuniit oqariartuutigineqarpoq siunnersuutip akuerineqarnerata kingunerigatarsinnaagaa, naalagaaffimmiit tapiissutit annikillileriffigineqalernerannik, taamalu Namminersorlutik Oqartussat ingerlatsinerminnut aningasatigut matussusiisinnaanerat mangiarneqalernerannik.

Minnerungitsumik siunnersuutikkut ammaanneqassalluni, pisuussutit uumaatsut qallorneqarnerannit isertitat ileqqaarnagit, ingerlaannartumik atorneqarsinnaalernissaat.

Tassungalu atasumik inuaqatigiinni aningasaorsiornikkut akimmiffit (akit qaffanneri, nioqqutit eqqussukkat annertusineri) atuutilersinnaaneri qaninnerulerlutik.

Partii Inuit makkuninnga tikkuagaqassaagut:

1.

Apeqqut qitiusutut isigisarput tassaavoq, aningasaateqarfip inatsisaani § 3. Imm. 3.'mik allannguinikkut suna anguneqassanersoq.

Illassutit allannguutip oqaasertai ima ipput: "Aatsitassanit isertitanut ilaanngillat timalittut pigisat nalillit, soorlu uuliakoorerup akiorniarnissaanut atortut, illut, allalluunniit sanaartukkat atortussiallu."

Partii Inuit tassani erseqqisumik isumaqarpugut. Tassalu aatsitassarsiutileqatigiiffit aatsitassarsiornermut atasumik sanaartukkat atortussiallu, soorngunami namminneq tamakkiisumik pisussaaffigalugillu akisussaaffigissagaat.

Tassa aatsitassarsiornermik ingerlatsisut nalinginnaasumik isumaqatigiissuteqarfifigineqarnerini erseqqisunuk pisussaaffilernerisigut akisussaaffilernerisigullu aaqqiivigineqarsinnaasut aaqqiivigineqartussallu.



INATSISARTUNI

Uagut inuiattut immitsinnut pilliutigisutullusooq pilluta aatsitassarsiutileqatigiiffinnut pisortatigoortumik tusaaniarnersuarput qujanarniarnersuarpullu pissusissamisuunngilaq pisariaqaranilu.

Taamaattumik allannguutissatut siunnersuutip § 3. Imm. 3.'mut tunngasortaa Partii Inuit akuerisinnaanngilarput, tassuunakkut immitsinnut naapertuutinngitsumik pisussaaffilerniarnerput, taamalu aatsitassarsiutileqatigiiffiit pisussaaffimmikkut akisussaaffimmikkullu annikillileriffigniarneqarnerat akuersaarsinnaannginnatsigu.

Naatsumik oqaatigalugu pisuussutitta uumaatsut avammut tunioraatiinnarnerisigut, taamalu avataaneersunit taamaallaat iluanaarutissanngortinneri, nunasiaanitsinnik nangitseqqiinnarneruvoq illorsorneqarsinnaanngitsoq.

2.

Soqutigaarput inuaqatigiittut sapinngisamik patajaatsumik ineriertortitsinissaq. Tassani qitiutillutigu uagut inuiattut nammineq soqutigisatta eqqumaffiginissaat, naalakkersuinikkullu siunnerfilersornitsinni qitiutinneqarnissaat.

Inuaat, inatsisartut naalakkersuisullu sinnerlugit pisortatigoortumik aatsitassarsioqatigiiffimmik ikummatissarsioqatigiiffimmillu ingerlatsineq anguniartariaqarpoq. Siunertalarugu uagut inuiattut annerpaamik immitsinnut iluaqtissinnissarput; aningasaqaqarnikkut, ilinniagaqaqarnikkut, misilittagaqarnikkut, oqartussaaqataanikkut, sunniuteqaqataanikkut, akisussaaqataanikkut, isertitallu uagutsinnut tamatsinnut sapinngisamik siammarternissaat qulakkeersinnaajumallutigu.

Partii Inuit taama oqaaseqarluta qujavugut.